

**REGIONAL NEWS UNIT**  
**ALL INDIA RADIO, AGARTALA**  
**Date : 31-10-2025**  
**Time: 07.35-07.40 AM Hrs**  
**BENGALI MORNING BULLETIN**

---

**Rashtriyo ekota diwas-PM:**

প্রধানমন্ত্রী নরেন্দ্র মোদী আজ গুজরাটের একতা নগরে সর্দার বল্লভভাই প্যাটেলের ১৫০ তম জন্মবার্ষিকী উপলক্ষে ২০২৫ সালের জাতীয় একতা দিবসের বর্গময় উদযাপনে দেশকে নেতৃত্ব দেবেন। প্রতি বছর ৩১ অক্টোবর সর্দার বল্লভভাই প্যাটেলের জন্মবার্ষিকী উপলক্ষে জাতীয় একতা দিবস পালিত হয়। জাতীয় ঐক্য, অখণ্ডতা এবং নিরাপত্তায় উদ্বুদ্ধ হওয়ার জন্য নিবেদিত দিনটি নাগরিকদের দেশ এবং সংস্কৃতির জন্য গর্বিত হওয়ার অবকাশ যোগায়। এই বছরের উদযাপনে ভারতের নিরাপত্তা বাহিনীর শক্তি, শৃঙ্খলা এবং সাহস তুলে ধরে একটি বিশাল কুচকাওয়াজ এবং সাংস্কৃতিক অনুষ্ঠানের আয়োজন করা হবে। কুচকাওয়াজে বিভিন্ন আধা সামরিক বাহিনীর পাশাপাশি আসাম, ত্রিপুরা, ওড়িশা, ছত্তিশগড়, মধ্যপ্রদেশ, মহারাষ্ট্র, পাঞ্জাব, জম্মু ও কাশ্মীর, কেরালা এবং অন্ধ্রপ্রদেশ সহ বিভিন্ন রাজ্যের পুলিশ, জাতীয় সমর শিক্ষার্থী বাহিনী NCC -র ক্যাডেট ছাড়াও "বৈচিত্র্যের মধ্যে ঐক্য" ভাবনায় NSG এবং জাতীয় দুর্যোগ মোকাবিলা বাহিনী NDRF সহ ১০টি রাজ্য এবং কেন্দ্রশাসিত অঞ্চলের ট্যাবলো প্রদর্শিত হবে। ভারতের বৈচিত্র্যময় সংস্কৃতি এবং সর্দার প্যাটেলের জীবন প্রসঙ্গে একটি প্রদর্শনীরও আয়োজন করা হবে। প্রধানমন্ত্রী আজ বিভিন্ন বাহিনীর কুচকাওয়াজ পরিদর্শনের পাশাপাশি একতার শপথ বাক্য পাঠ করাবেন। অনুষ্ঠানে শৌর্য্য চক্র ও সাহসিকতা পুরস্কার প্রাপ্ত এবং অপারেশন সিন্দুরে অংশগ্রহণকারী বিএসএফ জওয়ানদের সম্মান জানানো হবে। সর্দার বল্লভভাই প্যাটেল স্মরণে ১৫০ টাকার মুদ্রা এবং ডাক টিকিটও প্রকাশ করা হবে।

\*\*\*\*\*

## **Ekta Diwas-State :**

আজ লৌহ পুরুষ, ভারতের প্রথম উপ-প্রধানমন্ত্রী সর্দার বল্লভ ভাই প্যাটেলের ১৫০ তম জন্ম জয়ন্তী রাষ্ট্রীয় একতা দিবস। সারা দেশের সঙ্গে রাজ্যেও রাষ্ট্রীয় একতা দিবস উদযাপনে নানা কর্মসূচী নেওয়া হয়েছে। সকাল ৭ টায় আগরতলার বিবেকানন্দ ময়দান থেকে যুব কর্মসূচী ও ক্রীড়া দপ্তরের উদ্যোগে রান ফর ইউনিটির আয়োজন করা হয়েছে। এর আগে এখানে ক্রীড়া মন্ত্রী টিংকু রায় রাষ্ট্রীয় একতা দিবস উপলক্ষে দেশের একতা অখণ্ডতা রক্ষায় শপথ বাক্য পাঠ করান। বিভিন্ন সশস্ত্র বাহিনী, আধাসামরিক বাহিনীর জওয়ান, বিভিন্ন ক্রীড়া সংস্থার প্রতিনিধিরা রান ফর ইউনিটিতে অংশ নেন।

এছাড়া জাতীয় একতা দিবস উপলক্ষে আজ দুপুর আড়াইটায় রাজ্য পুলিশের মূল অনুষ্ঠান হবে এডিনগরে মনোরঞ্জন দেববর্মা স্মৃতি স্টেডিয়ামে। একতা দিবস উপলক্ষে পুলিশের বিভিন্ন ইউনিট কুচকাওয়াজে অংশ নেবে।

\*\*\*\*\*

## **C.M at Veterinary College :**

মুখ্যমন্ত্রী অধ্যাপক ডাঃ মানিক সাহা বলেছেন, রাজ্যের ভেটেরিনারি কলেজকে সারা দেশের মধ্যে অন্যতম শ্রেষ্ঠ প্রতিষ্ঠান হিসেবে গড়ে তোলার লক্ষ্যে কাজ করতে হবে। গতকাল আর কে নগরে ভেটেরিনারি সায়েন্সেস এন্ড এনিম্যাল হাজবেল্ডারি কলেজের ১৭তম প্রতিষ্ঠা দিবসের অনুষ্ঠানে একথা বলেন মুখ্যমন্ত্রী অধ্যাপক ডাঃ মানিক সাহা। অনুষ্ঠানে তিনি বলেন, পরিকাঠামোগত দিক দিয়ে এই ভেটেরিনারি সায়েন্সেস এন্ড এনিম্যাল হাজবেল্ডারি কলেজ অন্য মেডিকেল কলেজ হাসপাতালের চাইতে কোন অংশে কম নয়। ভেটেরিনারি সায়েন্সেস

হিউম্যান সায়েন্সের থেকেও জটিল। এই কলেজের ফ্যাকাল্টির স্বল্পতা দূর করতে গুরুত্ব দিয়েছে রাজ্য সরকার।

অনুষ্ঠানে বিশিষ্ট অতিথি প্রাণী সম্পদ বিকাশ মন্ত্রী সুধাংশু দাস জানান, বর্তমানে ত্রিপুরায় ডিমের মাথা পিছু প্রাপ্যতা উত্তর পূর্বাঞ্চলের মধ্যে সর্বপ্রথম। দুধ উৎপাদনে উত্তর পূর্বাঞ্চলের মধ্যে দ্বিতীয় স্থানে রয়েছে ত্রিপুরা। মাংস উৎপাদনে স্বয়ংসম্পূর্ণতা অর্জন করেছে রাজ্য। দুধ ও ডিম উৎপাদনের ক্ষেত্রে আগামীদিনে স্বয়ংসম্পূর্ণতা অর্জন করতে হবে বলে জানান তিনি।

\*\*\*\*\*

### **Anti drug-Success Khowai:**

নেশা বিরোধী অভিযানে পুনরায় সফলতা পেল বাইজাল বাড়ি থানার পুলিশ। পুলিশ গোপন সংবাদের ভিত্তিতে খোয়াই এর সীমান্ত গ্রাম বেল ছড়া এলাকার বরকের নামক একটি পাহাড়ি অঞ্চলে সম্প্রতি হানা দেয়। পুলিশ ও নিরাপত্তা বাহিনী সেখানে দুটি প্লটের প্রায় ৬ হাজার পরিপূর্ণ গাঁজা গাছ কেটে ধ্বংস করে দেয়। থানার ওসি যুগল ত্রিপুরা জানিয়েছেন, রাজ্য সরকার নেশা মুক্ত ত্রিপুরার জন্য যে পরিকল্পনা নিয়েছে সেই অনুসারে বাইজাল বাড়ি থানা এলাকায় ক্রমান্বয়ে একের পর এক নেশা বিরোধী অভিযান চালাচ্ছে এবং তাতে সফলতা পাওয়া যাচ্ছে।

\*\*\*\*\*

### **Airport Authority :**

আগরতলা এমবিবি বিমানবন্দর কর্তৃপক্ষের উদ্যোগে গতকাল আগরতলার উমাকান্ত একাডেমি বাংলা মাধ্যম বিদ্যালয়ে এক বিশেষ বিমান পরিবহন ক্যারিয়ার গাইডেন্স প্রোগ্রাম অনুষ্ঠিত হয়। এই কর্মসূচির মূল উদ্দেশ্য হল দশম, একাদশ ও দ্বাদশ শ্রেণীর শিক্ষার্থীদের বিমান পরিবহন ক্ষেত্রের সম্ভাবনাময়

ক্যারিয়ার সম্পর্কে অনুপ্রাণিত করা ও দিকনির্দেশনা প্রদান করা। অনুষ্ঠানে আগরতলা বিমানবন্দরের অধিকর্তা কৃষান মোহন নেহরা শিক্ষার্থীদের সঙ্গে মতবিনিময় করেন এবং বিমান পরিবহন সংস্থার বিভিন্ন দিক সম্পর্কে আলোচনা করেন—যেমন বিমান চালনা, বিমান ট্রাফিক নিয়ন্ত্রণ, বিমান নকশা, বিমানবন্দর ব্যবস্থাপনা ইত্যাদি।

\*\*\*\*\*

### **India reached final of Iccwwcup:**

আইসিসি মহিলাদের একদিনের ক্রিকেট বিশ্বকাপে, গত রাতে নবি মুম্বাইয়ের ডক্টর ডি.ওয়াই. পাতিল স্পোর্টস একাডেমিতে এক রোমাঞ্চকর সেমিফাইনালে অস্ট্রেলিয়াকে ৫ উইকেটে হারিয়ে ফাইনালে উঠেছে ভারত। ৩৩৯ রানের লক্ষ্য তাড়া করতে নেমে, ভারত ৫ উইকেট এবং ৯ বল বাকি থাকতে লক্ষ্য অর্জন করে।

\*\*\*\*\*

### **Weather :**

আজ আকাশ আংশিক মেঘাচ্ছন্ন থাকবে। রাজ্যের বিভিন্ন জায়গায় হালকা থেকে মাঝারি বজ্র বিদ্যুৎ সহ বৃষ্টিপাতের সম্ভাবনা রয়েছে। দিনের সর্বোচ্চ তাপমাত্রা ৩৩ ডিগ্রি সেলসিয়াসের কাছাকাছি থাকতে পারে। আজ ভোরে সর্বনিম্ন তাপমাত্রা ছিল ২৫.৪ ডিগ্রি সেলসিয়াস।

\*\*\*\*\*

\*\*\*\*\*